

खबरां

1. रेल मंत्री अश्विनी वैष्णव होरें जम्मू तवी रेलवे स्टेशन थमां विस्तारित श्रीनगर-जम्मू वंदे भारत एक्सप्रेस गी झंडी दस्सियै रवाना कीता।
2. रक्षा मंत्री राजनाथ सिंह होरें राष्ट्री सुरक्षा दे दुए सम्मेलन गी नमीं दिल्ली च संबोधित कीता। पाकिस्तान गी अंतरराष्ट्री आतंकवाद दा केंद्र दस्सेआ ते भारत गी सूचना प्रौद्योगिकी दा केंद्र आखेआ।
3. सुप्रीम कोर्ट नै केंद्र गी आखेआ जे ओहू दुष्कर्म पीड़ितें दे 20 हफ्तें शा मती अवधि दे गर्भधारण सरबंधी कनून च संशोधन करने पर सोच-विचार करै।
4. भारती मौसम विभाग नै अगले 3 दिनें लेई पच्छमी राजस्थान च मती गर्मी पौने दा अनुमान लाया ऐ।
5. आई.पी.एल क्रिकेट च गुजरात टाइटन्स अज्ज संझा अहमदाबाद च रायल चैलेंजर्स बेंगलुरु कन्नै मुकाबला खेडग।

<><><><><><>

Vande-Bharat

जम्मू-श्रीनगर बश्कार चलने आहली वंदे भारत एक्सप्रेस दी अज्ज औपचारिक तौर पर शुरूआत होई गई। इस रेल सेवा गी मते चिरें थमां बलगेआ जारदा हा। एहदे राएं तेज, आधुनिक ते हर मौसम च जम्मू ते कश्मीर बश्कार राबता बहाल होग। आकाशवाणी जम्मू संवाददाता दी रिपोर्ट मूजब राजधानी आहले दौनें शैहर जम्मू ते श्रीनगर रेल सेवा राएं सिद्धे जुड़ी गए न। ऐतिहासिक वंदे भारत एक्सप्रेसरेल सेवा गी केंद्री रेल मंत्री अश्विनी वैष्णव होरें झंडी दस्सिए रवाना कीता। रेल गड्डी नंबर 26401-26402 हफ्ते च 6 दिन चलोग। मंगलवार गी छोड़िए ते रेल गड्डी नंबर 26403, 26404 हफ्ते च 6 दिन चलोग बुधवार गी छोड़िए।

<><><><><><>

Vande-Bharat

प्रस्तावित एहू सेवा मौजूदा समें च वंदे भारत एक्सप्रेस इसलै कटड़ा ते श्रीनगर बश्कार चला'रदी ऐ ते इससै सेवा दा हुन विस्तार कीता जा'रदा ऐ। सीनियर डिविजनल कमर्शियल मैनेजर उचित सिंघल हुंदे मूजब एहू रेल गड्डी गर्म ते बर्फ दौनें तापमान च चलोग। इस गड्डी च 20 डब्बे होडन ते 1400 यात्री लेई जाने दी एहदी समर्थ होग। एहदे कननै सैलसफा गी बढ़ावा थ्होग। लोक इस नमीं सेवा गी लेइयै उत्सुक न। उं'दा आखना ऐ जे एहदे कन्नै खित्ते च यातायात होर सौखी होग।

<><><><><><>

CM-Hails

मुख्यमंत्री उमर अब्दुल्ला होरें अज्ज थमां श्रीनगर बश्कार चलने आहली पैहली सिद्धी रेल सेवा गी शुरूआत सरबंधी कार्यक्रम च शिरकत कीती। इस मौके पर किट्टु गी संबोधित करदे होई मुख्यमंत्री होरें इस मौके गी महत्वै आहला दस्सेआ कीजे जम्मू- कश्मीर दे लोक इस दिन गी मते चिरें थमां बलगा'रदे हे। उनें आखेआ जे वंदे भारत एक्सप्रेस सेवा दा विस्तार होना छड़ा बेहतर राबता गै नेई ऐ, सगुआं खित्ते दे विकास दी नमीं शुरूआत ऐ। मुख्यमंत्री होरें रेल मंत्री होरें गी Inland dry port जम्मू-कश्मीर च कायम करने दी अपील कीती।

<><><><><><>

Vaishnav-Anji

केंद्री रेल मंत्री अश्विनी वैष्णव ते केंद्री राज्यमंत्री जितेंद्र सिंह होरें अंजी खड्डु पुल दा दौरा लाया। एहू भारती रेलवे दा पैहला केबल पुल ऐ। एहू रेलवे दे ढांचागत विकास च इक महत्वै आहली उपलब्धि ऐ। दौरे दरान मंत्रिएं प्रोजेक्ट दी प्रगति दा जायजा लैता ते एहदी रेल संपर्क गी उजागर कीता। इसी इक हफ्ते आहला पुल करार दिंदे

होई उनें आखेआ जे एह पुल खित्ते च यातायात गी बेहतर करने ते आर्थिक गतिविधिएं गी बढ़ावा देने च महत्वै आहली भूमिका निभागा। इस दौरें दा मकसद सरकार दी इनें ढांचागत परियोजनाएं प्रति सरकार दी बचनबद्धता गी दर्शाना ऐ तां जे दूर-दरेडे इलाकें च रेल राबता बेहतर होई सकै।

<><><><><><>

DM-Pak Terror

रक्षा मंत्री राजनाथ सिंह होरें अज्ज पाकिस्तान गी अंतरराष्ट्री आतंकवाद दा केंद्र ते भारत गी सूचना प्रौद्योगिकी दा केंद्र करार दित्ता। नमीं दिल्ली च राष्ट्री सुरक्षा शिखर सम्मेलन च बोलदे होई उनें आखेआ जे आपरेशन सिंदूर नै दुनिया गी इक संदेश दित्ता ऐ जे भारत कुसै बी हालात च कुसै बी आतंकवादी गतिविधि गी बर्दाश नैई करोगा। सिंह होरें आखेआ जे भारत ओह मुख्य नैई रेहा जेडा उस परानी मानसिकता कन्नै अगो बधदा ऐ, जित्थे स्हाढी धरती पर आतंकवादी हमले होंदे न ते अस सिर्फ कूटनीतिक बयान जारी करदे रौहने आं। उनें आतंकवाद ते एह्दे प्रायोजकें च कोई फर्क नैई करने दी सरकारी नीति दी परतियै पुष्टि कीती। मंत्री होरें मुख्य च आर्टिफिशल इंटेलीजेंस दी भूमिका पर बी लोऽ पाई।

<><><><><><>

DM-Italian DM

रक्षा मंत्री राजनाथ सिंह होरें अज्ज इटली दे अपने हमरूतबा **Guido Crosetto** हुंदे नै नमीं दिल्ली च मलाटी कीती। रक्षा मंत्री होर इटली दे रक्षा मंत्री हुंदे कन्नै दक्खिया गल्लबात करंगन। दवें लीडर दौनें मुख्य बशकार रक्षा सहयोग कन्नै जुडे दे मुद्दे पर व्यापक स्तर पर चर्चा करंगन। सुरक्षा दे उभरदे परिदृश्य दे संदर्भ च इलाकाई ते कुल संसारी मुद्दे पर बी उंदे कन्नै विचारें दा इक दुए कन्नै सांझा करने दी मेद ऐ। इस थमां पैहले इटली दे रक्षा मंत्री होरें राष्ट्री युद्ध स्मारक उपपर फुल-माला अर्पण कीतियां ते गार्ड ऑफ आनर दा मुआयना कीता।

<><><><><><>

Supreme Court

Supreme Court नै 15 बरें दी बालिका गी 30 हफ्तें दा गर्भ चिकित्सकीय रूप थमा हटाने दी अनुमति देने दे कोई दे हुक्म पर रोक लाने दी एम्स दी याचिका पर सख्त ऐतराज जाहिर कीता ऐ। कोर्ट नै केंद्र सरकार गी एह सोच-विचार करने गी आखेआ ऐ जे दुश्कर्म पीड़ितें गी 20 हफ्तें थमां मते दे अनचाहे गर्भ गी समाप्त करने दी इजाजत देने लेई कनून च संशोधन कीता जाए। कोर्ट नै आखेआ जे जिल्लै गर्भावस्था, दुश्कर्म करी होई होऐ तां समें-सीमा गी सख्ती कन्नै लागू नैई कीता जाना लोडचदा। कोर्ट नै एह बी आखेआ जे कनून गी गतिषील होना लोडचदा ते बदलदे समें मताबक बदलाव कीता जाना चाहिदा।

<><><><><><>

Amit-Shah

गृहमंत्री अमित शाह होर अज्जै थवां 2 दिन दे लद्दाख दौरे पर न। इस दौरान ओह बुद्ध पूर्णिमा दे मौके पर कल्लै थवां शुरु होने आहली भगवान बुद्ध दे पवित्र अवशेषें दी पैहली अंतराष्ट्री प्रदर्शनी च हिस्सा लैडन। सोशल मीडिया पोस्ट च शाह होरें आखेआ जे दुनिया दे बक्ख-बक्ख हिस्सें थमां आए दे श्रद्धालु इस प्रदर्शनी च भगवान बुद्ध हुंदे अवशेषें दी पूजा करडन।

<><><><><><>

Odisha-Assembly

ओडिशा विधानसभा दा इक खास सत्र अज्ज बडुलै भुवनेश्वर च शुरू होआ जेदे च भारती लोकतंत्र च महिलाएं दी शमूलियत पर सोच-विचार केंद्रित ऐ। सियासी प्रतिनिधित्व बारै नमें सिरेआ राष्ट्री बहस दे मद्देनजर सद्दे गेदे इस सत्र च महिलाएं दा प्रश्नकाल नीति निर्माण ते विधायी संस्थाएं गी मजबूत करने च भूमिका पर जोर दित्ता गेआ ऐ।

<><><><><><>

CEO-Pudduchery

मुख्य चुनाव अधिकारी दे दफ्तर पुदुचेरी नै 4 मई गी होने आहली 2026 दी विधानसभा लेई वोटें दी गिनतरी लेई व्यापक बंदोबस्त कीते ना। सख्त सुरक्षा बंदोबस्त दे तैहत सभने खेत्तरें, पुदुचेरी, कराईकल, माहे ते यनम च 6 मय केंद्रें पर गिनतरी कीती जाहगा।

<><><><><><>

Counting-Arrangements

ई.वी.एम ते वी.वी-पैट राएं वोटें दी गिनतरी लेई कुल 166 टेबलें दा इंतजाम कीता गेआ ऐ जेदे कन्नै गै डाक मतदान लेई 35 टेबलें दा इंतजाम कीता गेआ ऐ। ईवीएम ते वीवीपैट गिनतरी लेई 218 गिनतरी सुपरवाइजर, 221 गिनतरी सहायक ते 232 माइक्रो ऑब्जर्वरें गी तैनात कीता गेदा ऐ। चुनाव आयोग दे दिशा-निर्देशें मताबक त्रै स्तरीय सुरक्षा प्रबंध कीते गेदे न जित्थे केंद्री सषस्त्र पुलिस बल ते मकामी पुलिस सुरक्षा गी यकीनी बना'रदी ऐ। गिनतरी हाल दे अंदर वैध पंछान कार्ड आले अधिकृत लोकें गी गै अंदर जाने दी इजाजत होग।

<><><><><><>

Shekhawat Somnath temple

केंद्री संस्कृति ते सैलसफा मंत्री गजेंद्र सिंह शेखावत होरें अज्ज आखेआ जे सोमनाथ मंदर भारत दे आत्मसम्मान, लचीलापन ते अदम्य भावना दा प्रतीक ऐ। मंत्री होरें एहू गल्ल नमीं दिल्ली च सोमनाथ स्वाभिमान पर्व यात्रा दा उद्घाटन करदे होई आक्खी। इस मौके पर बोलदे होई शेखावत होरें आखेआ जे इस गैहू कन्नै नागरिकें गी भारत दे अतीत थमां परखें ते ढोहने दे बाद बी परतियै उठदी खलौने दी भावना थमां प्रेरणा लैने लेई प्रेरित कीता जाहगा।

<><><><><><>

Shah Guru Amar Das

केंद्री गृह मंत्री अमित शाह होरें सिख धर्म दे त्रीए गुरु, गुरु अमरदास हुंदे जन्म ध्याड़े दे मौके पर देशवासिएं गी अपनी शुभकामनां दित्तियां ना। इक सोशल मीडिया पोस्ट च अमित शाह होरें मनुक्खता गी अहंकार गी त्यागने ते सेवा, समर्पण ते स्मरण दे रस्ते गी अपनाने लेई प्रेरित करने लेई सिख गुरु होरें गी चेता कीता।

<><><><><><>

IMD

भारत दे मौसम विज्ञान विभाग नै अगले 3 दिनें लेई पच्छिम राजस्थान च गर्मीं दा प्रकोप दी भविष्यवाणी कीती ऐ। तटीय आंध्र प्रदेश, ओडिशा, तमिलनाडू, पुदुचेरी ते कराईकल च अगले दो दिनें तगर गर्मीं दे कन्नोकन्नी गुम्मा रौहने दी मेद ऐ। भारती मौसम विभाग नै कल अरूणाचल प्रदेश, असम, मेघालय, नागालैंड, मणिपुर, मिजोरम, त्रिपुरा, उपहिमालयन पच्छिम बंगाल ते सिक्किम च भारी थमां मती भारी बरखा बरने दी मेद दस्सी ऐ। केरल माहे, तमिलनाडू, पुदुचेरी ते कराईकल च दो मई तगर भारी बरखा होग। एह्दे अलावा कल बिहार, उत्तराखंड, छत्तीसगढ़, झारखंड, मध्य प्रदेश, ओडिशा, पच्छिम बंगाल ते पूर्वोत्तर राज्यें च अंधी झक्खड़ चलने ते बिजली चमकने दी मेद ऐ।

<><><><><><>

Crude-Oil Prices

वैश्विक कच्चे तेल कीमतें च लगातार तेजी आई ऐ। वाशिंगटन नै अपनी नौसैनिक नाकाबंदी दा कोई कमी नेई करने दी सारत कीती ऐ ते तेहरान कन्नै जुड़े दे टैंकरें गी जब्त करने लेई कदम पुट्टेआ ऐ जेदे करी लम्में समें तगर आपूर्ति च रुकावट दा डर पैदा होई गेआ ऐ।

<><><><><><>

मुख्यमंत्री उमर अब्दुल्ला होरें अज्ज बडुलै जम्मू च इक काबिना बैठक दी प्रधानता कीती। एहू बैठक सिविल सचिवालय श्रीनगर जाने थमां पैहले लग्गी। एह्दे मगरा सिविल सचिवालय अगले 6 म्हीनें लेई श्रीनगर चली जाह्ग। इस दरान महत्वपूर्ण विकास जर्नें ते तरजीह आहले मामले पर चर्चा कीती गई।

<><><><><><>

IPL

नरेन्द्र मोदी स्टेडियम अहमदाबाद च अज्ज रॉयल्स चैलेन्जर्स बैंगलूरु दा मुकाबला गुजरात टाइटन्स कन्नै होग। एह मैच संजा साड्डे 7 बजे खेडेया जाह्ग। IPL क्रिकेट च कल राती मुम्बई दे वानखेडे स्टेडियम च खेड्डे गे मैच च सनराइजर्स हैदराबाद नै मुम्बई इंडियन्स गी 6 विकेट कन्नै हराई दिता। 244 रन्ज दे लक्ष्य दा पिच्छा करदे होई सनराइजर्स हैदराबाद नै 18 ओवर 2 गेंदे च 249 रन्ज बनाए।

<><><><><><>